

條

麓

堂

集

條麓堂集卷之二十九

誌四

西河恭定王妃墓誌銘

妃姓楊氏平陽之襄陵人也父節母祁氏初妃之將誕也蓋有異兆云既生淑慎靜貞不與凡女類及笄選配西河恭定王為繼妃時王妣葉太夫人有母訓命王冕而親迎以隆大禮天子乃遣世臣持節授冊封一時稱盛焉妃既正顯號享豐祿惟儉惟勤不改其素媵御僮侍畏而知恩為婦為母卓有壺範恭定父子悉以孝行膺欽獎有令名于宗室間則妃之內助慈訓槩足稱也

妃生于弘治丙辰正月十九日薨于隆慶壬申十二月
九日享年七十有七生子男一人表相即今王初配王
氏封夫人卒繼王氏封妃孫男五知燧封王長子聘張
氏知饒娶劉氏知燧娶周氏知燁聘高氏知杰俱封鎮
國將軍妻皆封夫人孫女三長隆化縣主適儀賓侯炳
次渠江縣主適儀賓李薰次武陵縣主字儀賓師鯉曾
孫男六新壩新鑿新垓新塏饒子餘二幼未賜名燧子
曾孫女二亮寨縣君適儀賓張邦治礪山縣君幼妃既
薨之次年癸酉今天子改元萬曆聞妃訃命所司賜祭
奠如制今王祇奉欽命卜吉四月二十一日啓恭定王

壙而合祔焉禮也廼先走使蒲坂持前太史四川右轄
余師水陽亢公狀徵余為銘河東諸郡同姓王自晉代
二藩析者無慮六七國其世濟懿美享國最長久者莫
如西河迨今王樂善好賢崇德廣譽慶祚為益悠矣余
固習知其世訓有異人者茲睹妃之內則廼又慨然興
敬焉夫王國孫子自古多驕佚鮮循軌度豈其居養固
然哉無亦其父母所以訓育之者不西河若也銘曰公
族麟趾風始周南千年嗣美西河徽音樛木歸仁瓜瓞
衍蕃黃髮偕老閔及雲仍惟德之光惟胤之昌河山鬱

嶂永固玄堂

封一品太夫人王母張氏墓誌銘

誥封一品張太夫人者贈光祿大夫太子太保吏部尚書王公諱承祖之配太子太保吏部尚書國光之繼母也贈公初娶于原生太宰昆仲而歿張太夫人繼之其撫太宰昆仲也最慈太宰之孝事太夫人蓋行年七十而猶孺慕焉太宰既致政奉膝下懽凡再踰年而太夫人歿天子念太宰忠勞詔禮官頒祭葬如制越明年安厝有期矣太宰乃命其仲胤舉人兆河持劉叅知東星所為太夫人狀自陽城走蒲徵余為銘余猥辱太宰知獲從游且三十年先是太宰佐銀臺嘗予告省母余為

叙其行其知太夫人淑懿舊矣茲余方在大戚屏鉛
顧念太宰不匱之孝思弗忍拒也遂勉強述而銘之按
狀太夫人陽城之龍泉里人父紀母延氏生而端靜沉
默服習女訓為族黨所稱當太宰昆仲失恃時贈公母
李夫人憐孫弱穉為慎簡女士之溫惠者故太夫人歸
于王李夫人性嚴重不可犯太夫人承順顏色周旋朝
夕遂大得其懽心勤敏精幹持家甚力織紉修澆并臼
澣濯無不躬親之者贈公旅遊南北或終歲不歸一切
家政咸太夫人綜畫閨以内井井也撫育太宰昆仲愛
而能訓太宰知學太夫人喜其穎脫米鹽供具春秋周

瞻殆過于所生平生無疾言婢妾有過多含容之盖天性然也太宰初為吏部郎奏績封母太安人及為戶部侍郎封太淑人進尚書封太夫人及正位端揆乃進今封前後凡四受恩賜康寧耄壽庭幃全福人間世殆罕儷云太夫人生弘治辛酉十月十二日卒萬曆甲申八月初四日享年八十有四子四人長重光娶竇氏繼楊氏次即太宰公娶張氏贈一品夫人繼衛氏封一品夫人次奎光娶張氏次近光娶楊氏女四人一適庠生李雲鶴一適延登洲一適李騰鶴一適典史樊學詩奎光暨三女為太夫人出其近光暨女之適樊者側室出也

孫男九堯山堯日兆渠官生兆河舉人兆星庠生兆雲
監生兆官兆民庠生兆行孫女十曾孫男女各八玄孫
女一銘曰一膜隔恩振古興惻慈淑唯母寔標女則鞠
哀均恃訓賢櫛國板輿逐子祿養以色翟服章身鸞文
表德闕曾暨玄令飴孔適帝命秩宗恩覃玄域生順沒
榮天道靡忒永世有徵堅珉是勒

封恭人賈氏墓誌銘

誥封恭人賈氏者前巡撫順天都察院右僉都御史三
山溫公景葵配也三山公以才見任于時先後踐歷率
盤錯人所憚避者廼公毅然受事盡瘁在公汲汲然不

遑其家之恤者則以有恭人在也恭人跋涉南北從夫子艱險中拮据求濟汲汲然亦不遑其身之恤故三山公所至著殊異勲為時名卿可不謂內助與嘉靖乙丑三山公理畿左既事有績矣而公則已病于是督臣代以請告天子予之居無何公疾有瘳而恭人逝矣其服勤可念也三山公將以其歲冬仲莖恭人大同府城東牛家莊祖塋之次廼自為狀走使京邸屬史維為之銘焉按狀恭人大同縣南關廂人也父鍾代府引禮官母李氏乃正德辛未十一月十一日恭人以生後十有四年為嘉靖甲申而恭人歸于溫氏迨丙午以三山公卒

長平三年課最恩先封孺人甲寅又以三山公侍御課
最恩改授勅命壬戌三山公又奏兵憲右北平績遂膺
誥命進今封迄今歲丙寅八月七日而恭人以卒得年
蓋五十有六云恭人溫惠端默出自天性孝敬勤儉終
始一節外呐呐如不能言而中井然有辨凡纂紉滌滌
箕帚之職朝夕甚辦乃壺中竟日不聞笑語聲其姑太
恭人深器之亟稱其能蚤歲家故弗饒于財房奩獨薄
絕無歆羨意晚年視曩昔稱裕矣然亦粒米寸縵罔敢
輕棄常服三澣不尚紅紫曰吾弗忍暴天物也至于歲
時賓祭則又盡志盡物即稍有不致豐潔必疚然在心

久不能釋其與人雅重然諾至于報施必從其厚待諸叔伯孫子無異所生雖疎遠有急必周雖微賤為禮必答食有餽必給之婢妾尤必親為之宰其純厚類若此也與三山公處四十餘年備歷諸艱所以贊襄而慰安者無所不至子男二人曰習易早卒曰習傳娶趙氏恭人凡前後男女十七娠多不育因為三山公置妾劉氏縉紳間尤以此重之銘曰天賚名德作翰于國迺詒淑佐俾罔內之恤惟爾德之殖溫惠自飭安儉居勤越初終靡忒肆夫子桓桓在公宣力有赫其庸相惟爾職亦既熾昌如農斯穡偕老豈不臧胡還之亟惟淑行之多

未償其食畜慶流禎爾子孫是翼

封宜人蔡氏墓誌銘

誥封蔡宜人者督府前溪張公之元配也嘉靖己未天子深惟北門之重念冠之未戢簡于封疆之臣其壯猷足以威遠殿邇有明效者遂勅督府總雲中上谷之師建幕陽和宜人從焉其冬虜入犯洪蔚勢張甚廼督府提孤軍以走之于是宜人病次歲寢堂東北陬有星隕如炬宜人遂卒庚申正月廿二日也距其生正德癸酉得年才四十八爾越四月督府命其子啓蕃扶櫬還洛陽葬有日走使京師函憲副王西石氏所為狀俾其門

下士張生四維誌而銘之誌曰張與蔡蓋洛陽之著姓
云宜人父曰處士公諱某母某氏宜人之生也處士公
則聞門外若有鼓吹騶從聲心異焉比長果不類凡育
凝靜寡言咲巧慧警悟一切剪製縷結出其手即絕人
處士公益異之曰兒必貴為之卜婚一日見督府則大
奇之曰卽君異日者必貴迺嘉靖辛卯宜人來歸于張
歸而諳婦職執勤夙夜得姑舅之歡心督府時為弟子
負有偉聲于洛中宜人益復勸相不憚以其簪珥供鉛
槧費同行者或謂之弗恤也歲丁酉督府舉于鄉明年
戊戌登進士某歲以戶部主事考績最推恩封宜人為

孺人乙巳督府進貢外郎會九廟成覃恩加封今號蓋
督府登第甫八年而宜人兩被恩洛人由是異處士公
之先見有徵也此督府歷藩臬撫畿輔尋授節鉞駸駸
尊顯矣宜人猶持儉朴如初衣必澣濯寸絲粒米不妄
費然至賙急恤困若將不及焉其天性然也事督府幾
三十年相敬如一日訓子女有成式撫諸庶若已出其
令德種種宜壽也廼不果壽命哉子男二人長即啓蕃
業明經有聞娶許氏工部貢外郎詩女次啓佑幼側出
女四人一適荏平尹蔡承舉子檀一適太學生孫祺子
光遠俱庠生一字學憲吳三樂子本一字符卿劉得之

子志孫女一人蕃出幼銘曰崧高嶭嶭贊運生傑予以
相之誕惟淑哲夫子靖共承以匪懈中壺穆矣曰靡內
戒夫子清修儉不失故毗爾冰蘖清我荆布赫赫夫子
惟邦之翰建旄秉鉞軼駕范韓惟帝念功延賞于室翟
冠玉璵鸞文有熠既昌而躬載熾而後來祉方新胡靳
斯壽周郊膺膺有崇者阡我銘不爽對于萬年

封宜人張氏墓誌銘

誥封晉宜人者戶部員外郎厚齋公朝臣之配而陝西
按察司副使應槐母也初副使弱冠取高第典文銓致
位列卿年方三十所于時才名燁然照搢紳矣顧其中

循循甚虛余時獲與副使游竊意其蚤達而練非獨其
質美則然必其所以成之者有素爾及後見厚齋公貌
莊而氣和其所蘊負甚遽則知副使之賢蓋得之庭訓
茲復觀厚齋公所為宜人狀云云者益知副使所以特
異于人為慈誨之所乎化遠矣按狀晉與張皆洪洞著
姓宜人父巡母龐氏以正德癸酉五月十四日生宜人
自初有識言動即與諸女不類宜人祖半山翁滿者雅
有人倫之鑒則甚竒宜人謂必昌大人宗不欲配凡子
當其時厚齋公父元城丞諱偉者方以儒起家亦竒異
其子為妙選良配故宜人歸于晉焉厚齋公少失恃祖

母宋撫之極慈宜人承事宋及繼姑樊咸得歡心會邑
大疫厚齋公與其二弟及樊俱染焉孺人煮粥藥奉病
所朝夕必徧再閱月病者皆起宜人竟無恙比生副使
洪洞人謂天道有知也厚齋公庚子舉於鄉已屢上春
官不第宜人所以慰奉甚至比守和郡擢司農大夫宜
人躬秉勤儉佐之厚齋公得以一意在公不卹其私所
至以清幹稱宜人教副使兄弟愛而能勞具有規度故
副使蚤年穎脫而諸子奕奕咸克紹其家聲曩時半山
翁昌大人宗之鑒信有徵也宜人性不喜華侈自奉甚
約始終一節其御臧獲有恩治家極節縮而好施予諸

貧乏者萬曆甲戌閏十二月一日以疾卒距其生得壽六十有二初以副使貴封安人及厚齋公官司農會天子登極覃恩受今封凡生子男五人長即副使應槐前吏部郎中太常寺少卿娶鄭氏封安人次應龍散官娶韓氏次應兆國子生娶衛氏繼李氏次應庚邑庠生娶南氏次應麟邑庠生娶韓氏女一人適劉承光孫男八承寵邑庠生娶李氏承賜娶張氏承聘邑庠生聘徐氏承忠聘陳氏承訓聘高氏承薦聘趙氏承誥承眷孫女三一字商希稷二幼曾孫男二淑元淑愷副使兄弟為宜入卜兆於龍泉鄉祖塋之次葬且有日廼以厚齋公

狀來囑余為銘誌凡狀所述宜人德美甚具茲不悉著
著其大都云銘曰降嫺自天惟淑德之茂夫曰令妻子
曰賢母亦既亢厥宗受祉孔厚彼汾一曲厥壤惟阜刻
銘玄宮永有辭于後

栗太孺人墓誌銘

栗太孺人者上黨兵馬指揮崔公鎮之女義官栗公鎬
之子婦指揮公淮之配也維與孺人季子曰繼祖者同
以已酉舉于鄉相得蓋驩然歲甲寅繼祖之兄繼文衰
服斬焉見我于長安之寓廐而言曰某不幸先母亡矣
先母之撫我兄弟也慈甚予兄弟之遠違也未嘗不日

夜思然謂母之康厚弗憂也迺今一旦丁于大故予寔
隕然莫知予心念予弟與子同年而雅相好顧于銘吾
母維聞則甚戚之然未敢承也居無何繼文兄弟使者
自上黨來手太孺人之狀以請維因不敢辭按狀栗與
崔俱潞安望姓孺人之母曰陳氏與兵馬公俱治家有
法孺人生既德美又服習訓則女紅外讀古孝經列女
傳通其義焉迨歸指揮公適舅義官公與姑高孺人相
繼病孺人膳必親藥必嘗左右指揮公甚至高不起事
義官公又二十年虔敬有加指揮公性嚴毅莫可犯孺
人以順正輔之共祭祀仁賓客睦妯娌馭臧獲賙困乏

諸皆可稱其綜理家政井井秩序嘗曰富生侈侈必敗
故簡朴自持終始不改栗氏素裕于財暨指揮公以心
計貨遊于江湖孺人以恪儉經紀于閭內益以賢雄于
鄉閭云教子女各有矩矱故子皆偉于自立女適人皆
為良婦人有令聲孺人以弘治甲寅七月初一日生以
嘉靖甲寅二月二十八日卒得年六十一壽矣視德為
儉子男三人繼文陵川王府儀賓配湘鄉郡君繼禮娶
郭氏繼祖舉人博學而能文儔有時望將以振揚光大
于時以丕聞太孺人之潛德者可立待也余以同年故
知之詳娶李氏女二人一配稷山王府輔國將軍胤橈

一配清源王長子胤叔孫男八永壽永年永慶永光永
亨永庾永新永馨孫女七俱幼繼文兄弟請于指揮公
卜以某年某月某日葬於秦村之原銘曰惟家之穀惟
婦之淑蕃胤衍祥厥繇母良都矣孺人婉德孔倫承祐
有嚴培祉曰仁奕奕蘭華騰芳粵嘉門楣赫郁煥發其
芽蹈彛之劬膺祿之茂恩賁匪遐靳此中壽有撫者原
有崇者阡安珍源休自今萬年

封劉孺人墓誌銘

劉孺人者今湖廣提刑沁陽張大夫之元配也大夫先
任侍御史之三年天子嘉其諒直因推恩孺人錫之勅

命以彰內助效時嘉靖戊午冬也後六年甲子正月八日而孺人卒于家年僅三十有九于時大夫方駐節榔陽去沁四千里而遙聞其訃悲焉廼述孺人世行走使燕京屬史維誌而銘之初歲癸丑天子既賜禮部所貢士第復於中遴二十有八人俾讀中秘書于是吾晉在選者二人則大夫與維也二人者既合志而同業其出入朝夕必共來往二家二人忘其賓主也維見大夫之庭戶肅僮侍馴堂以內寂若無人主人欲食賓輒咄嗟而辦滌漚精至心甚能孺人數為余妻道之謂大夫之得匹也嗟嗟廼今遽至爾耶余既諳孺人賢凡狀所云

云悉信閱之則益悲因撮其語銘之俾永有考焉按狀
孺人其先蓋鳳陽亳州人始祖諱贊者有成功高帝時
位特進其後以蔭資授潞州千戶屯磁州迨孺人高祖
鶴陞沁州衛指揮僉事屯鷄澤迄今子孫籍焉曾祖承
貴前職祖錦父純儒學生入貲授指揮配甘氏于嘉靖
丙戌十二月十四日生孺人孺人方五歲失母育于祖
母程靜順寡言不與諸姊較及笄每歲時嘗祀輒念母
泣涕不食飲程大賢之謂指揮公勿以女子凡子于時
大夫方志學嶄然見頭角矣大夫考曰大理少卿漳源
公母曰勅封周太孺人者亦已奇異其子擇淑配故自

鷄澤抵沁相去且四百里而孺人歸于張焉孺人恬素
肅雍克敬克戒舅姑安其孝謹妯娌宜其溫恭親黨稱
其篤惠而益以勤敏相其夫君每鷄鳴燃燭侍大夫誦
讀不以寒暑替壬子大夫舉于鄉明年登進士選翰林
院庶吉士乙卯授河南道監察御史辛酉以言事忤權
貴人陞河間府知府孺人前後從大夫于京至是從河
間綜範頌整門外內密然大夫用無內顧憂癸亥大夫
陞湖廣提刑按察司副使奉專命督柳桂兵備遂單車
蒞任留孺人侍太孺人養于家孺人體故癯中歲以誕
育蕃且多不舉益羸毀故不永于壽云然篤于婦道事

太孺人雖一薶一莖必躬奉之病既甚猶力病視事不欲以身故貽太孺人憂既子女屢失廼為大夫置媵侍撫視款款有古淑女風焉大夫有子一人曰慶徵者孺人遺也宣淑襲祉將于是乎在銘曰世祿生侈鮮惟由禮物情固爾婉婉吉人秉哲高門惟德之行棄華存素靜言安步不愆于度惠且有嚴肅雍庭檐小大以恬足相夫子秉憲陳紀為天子使有煒鸞文翟第如雲榮間在身方駕修轍中涂脫輻奄然不淑夫子揭揭相惟爾烈胡遺之子羨門且局不掩其馨徵在斯銘

封孺人李氏墓誌銘代作

勅封李太孺人者前侍御今山東提刑申大夫佐之母也大夫按部東土奉太孺人祿養焉踰朞而太孺人卒于官所大夫扶輦歸廣平將以今歲丙寅某月某日合祔于厥考贈公之兆廼走使京邸持山西按察司副使張君學顏所為狀徵銘于余余前歲待罪廣平獲從其賢士大夫游因以諗其風美與夫鉅人哲媛卓然為邦之選者若李太孺人之淑懿蓋數數聞之凡狀所稱述不誣也初贈公娶于魏而無子遂再室李氏贈公母李孺人見而悅之曰婦惠且孝異日必昌吾後已而太孺人果娠大夫感異慶焉大夫方在襁褓而公歿李孺人

亦已垂老至申故鉅鹿宦族然以清白業其世窶空儋石自公在則然矣當是時人咸謂太孺人不堪太孺人矢死靡它志涕泣績紡以事親訓孤晝夜矻矻拮据萬狀故姑獲以恬頤壽終而子蘄然致通顯可不謂難與方大夫從學自有知至成德節以繼志慎交為最此大夫從政凡三任皆法官又節以平反欽恤為戒故大夫為士則連取上第為吏雖振揚風紀而所至稱平焉其得于內教深也贈公生于成化丁酉某月某日卒于嘉靖丁亥某月某日得年五十有一魏孺人生成化丙申某月某日卒于嘉靖丙申某月某日得年六十有一太

孺人生弘治己未九月二十一日卒于嘉靖乙丑二月
二日得年六十有七蓋公歿至是四十年魏孺人亦已
歿三十餘年矣狀以合祔太孺人請銘故不詳公與魏
孺人行余因系申之世而為太孺人銘其世曰申之先
蓋山西屯留人後徙絳國初諱庸者游宦東土道廣平
樂馬遂為永年人公高祖達汝寧知府曾祖寧以賢良
方正徵不就祖廣靈壁主簿以子綸貴贈兵部員外郎
父紀母李氏公諱成字克紹勅贈文林郎岳州府推官
配魏氏贈孺人李氏即太孺人子男一人大夫注也太
孺人出娶劉氏繼娶蘇氏女二人適張松鄭杰魏孺人

出孫男一珩聘王氏孫女四適王文耀張承祚張采俱
庠生一字張三才其銘曰侈于死節立孤之艱古烈士
夫且謂其然矧伊淑女司惟筐筥中道不夭誓心自許
尊嫜在堂崦嵫景急遺孤在抱呱呱而泣三世一息四
壁隻影餐蓼忘辛茹冰匪冷遺經可教畫地以傳振芳
奕代受祉于天姑既爾殯子寔爾成百年無媿歸報九
京明山之陽川原膺膺有崇者旣貞烈之宇滙靈儲慶
貽于嗣人萬年考德徵此堅珉

沈母范孺人墓誌銘

范孺人者處士東原沈公諱澐之配陝西鞏昌府同知

厚夫母也以萬曆癸酉十二月二十九日卒距其生正
德丙寅十月二十七日得壽六十有八先是孺人隨厚
夫養宦卽是冬厚夫自涿郡守遷貳鞏昌奉孺人過里
為一孫完姻事愉愉如也未幾而孺人歿于是東原公
棄養凡二十有七年矣厚夫卜以甲戌某月某日奉孺
人柩合祔東原公之窆廼自為狀泣涕而徵銘于余初
余祖姑適沈氏于孺人為伯姑余伯姨又為孺人堂嫂
沈氏族大而聚居余少時往來祖姑伯姨家見聞孺人
之淑懿甚習余第四術獲為孺人婿孺人長孫懋者復
室余猶子余既雅欽重孺人聯之以世好則所以章顯

間德用徵于悠久者誼不可得辭也按狀孺人姓范氏
父喬柯母李氏孺人在襁褓而孤隨母育于繼父張大
輝及笄歸東原公貞靜寡言勤苦自勵是時姑丁孺人
在堂丁治家嚴整孀居且三十年屬家中否孺人黽勉
有無以供朝夕為能得其懽心東原公服賁于外率數
年一歸孺人持家儉素蔬食浣衣雖寸帛尺楮莫肯遺
棄至于祭享賓燕則務為豐腆見人困阨則卹之至脫
簪珥由是內外稱之曰賢初東原公以祖父俱業儒奪
于家計不獲事鉛槧嘗自以為恨厚夫生有異質弱不
好弄孺人喜曰是可以承夫志矣廼遣束書就學督課

甚至故厚夫年未弱冠領鄉薦內訓使然也孺人性慈
惠撫孤姪若孫為之婚嫁不異已出猶子觀生而失母
則取而乳哺之處姻族咸有恩禮御戒獲尤能加意體
念各得其情厚夫宦游一紀餘前後凡五任孺人皆從
養能隨事訓誨歷歷皆官箴要語厚夫祇奉之故所至
著稱孺人晚年尤崇奉鬼神晨夕則焚香致祝雖一蔬
一果必薦而後用焉生子男一人應坤即厚夫娶王氏
繼楊氏張氏女二人一適杜希晦一早卒冥配余亡弟
四術孫男七懋楊出娶張氏余猶子懋娶范氏懋聘陳
氏懋聘羅氏懋懋懋俱幼銘曰惟家之阜相惟淑婦惟

衛之昌粵由母良婉婉孀人德音不陂婉美發祥厥懿
孔多既亢厥宗益衍厥緒祿養允康休有譽慶中條之
麓有封若屋雙璞完歸萬葉集福

女轉壙銘

鳳簪張子某第二女曰轉姐生而髮垂額角眉目如畫
性慧悟解人意而復靜重寡言心甚憐念之謂其異稟
不與凡兒類也年十歲忽遘風癘之疾百醫滋不效竟
以殤死時余方從宦在都棺殮之權厝僧寺既逾歲余
再謁告還里屬友人雒氏有其兄之喪遂附女柩以歸
葬于蒲風陵鄉祖阡女生嘉靖壬戌十二月三日歿于

隆慶辛未三月一日其葬于蒲為壬申十一月二十四日銘曰生孰使之惠且靈沒孰趣之曾不暫停婉孌念爾心靡寧歸從祖妣兮固玄扃

附錄

勅建張氏澗南新塋后土志

維歲在昭陽協洽天子命工部屯田清吏司主事四明沈一中為先考誥封光祿大夫柱國少師兼太子太師吏部尚書中極殿大學士岷川府君營葬事孝男四維等祇奉命使周爰擇兆得地于澗南祖塋之東南相去僅里許龍山自中條筆架峯發脉循蒼龍谷迤邐而來

騰躍蟠護逆水右環土壤豐腴體格正大負壬抱丙堪
輿告吉廼蠲辰寒露後二日啓土建城以丕承天子之
赫顯休命夫靈臯奧區含淑鍾秀必有明神主之廼即
墓左封丘為位恭祠本塋司土之神伏願明神靈承帝
貺申錫天庥翕集禎祥屏除妖孽以保衛玄宮垂洪佑
于千萬年永永無極謹勒貞石納之封中使後之子孫
世載陰騭寅享弗替云大明萬曆十一年八月二十四
日光祿大夫柱國少師兼太子太師吏部尚書中極殿
大學士孝男四維謹志

張氏族葬新塋后土志

張氏祖塋在蒲州大澗里之南風陵鄉始祖履道府君
當勝國末自解徙蒲寔始卜地焉四世祖克亮府君就
其南稍拓之二百年于茲聚族以葬纍纍然相望幾無
隙地先考誥封少師大學士岷川府君既為祖妣治新
阡于祖塋之東復卜地巽隅為族葬計會勅建先考塋
兆巽隅之田適在周塹以內有難建域今歲乙酉余既
終禫思惟先志所當恪奉有終乃改諏吉壤于祖塋之
艮隅爽塹宏廓卜人告得兆于是族衆惟從叔允福屬
最尊為最長僉議擬建以為新塋祖其餘在昆弟子姓
俾各以班祔如初乃筮閏九月十有八日建表立向爰

立后土神宇于塋之中謹率族衆刲牲陳祀瘞而封之
仰藉神庥俾陰沴全消諸祥畢集以永衍我張氏二百
年來宗系及于無窮皇明萬曆十三年十月五日光祿
大夫柱國少師兼太子太師吏部尚書中極殿大學士
鳳磐張四維謹志

先考妣岷川府君王夫人合葬壙記

嘉靖三十四年十二月十三日先妣贈一品夫人王氏
卒不孝男四維輦奉先考命卜葬于澗南祖塋東隅祖
考妣新阡之次邇來二十有九年矣維藉先澤叨三事
追惟先妣劬勞勤瘁不獲享一日之養歲時瞻慕忉怛

靡極乃所植墳栢已蔚然森竦成林矣萬曆十一年三月二十三日先考封少師嶺川府君復棄諸孤天子念不孝維輔理微勞頒卹孔渥命工部遣官以一品制營葬命禮部遣官頒諭祀六壇父母並祭令甲文官葬式惟一品為極隆父母受一品封者祭二壇其加壇並祭則我皇禮下體臣之特恩非常典也其年六月二十四日禮部主客司員外郎張志捧綸音來祭其詞曰惟爾積德在躬鄉評推重爰有良配一德相承篤啓哲賢朕朕帝室睠此疑丞之績寔由訓育之勤先後淪亡良深憫惻特偕賜祭載飭幽塋靈爽如存歆承殊渥八月二十四

日工部屯田司主事沈一中奉明命來營葬去舊塋東南百餘步有地一區面勢明敞土脉豐腴地理家咸以吉告不孝孤輩乃祇從沈君後啓土營兆冀以顯承異寵幽奠先靈玄室既成諏筮明年春二月十三日治先考府君之殯乃啓先妣夫人之壙奉柩合葬焉命使周旋湛恩賁赫不孝怙恃之慟存于風木者固終天其罔極主上覆燾之澤漏于泉壤者實曠代之希邁也嗚呼悲哉先考生正德元年四月初四日距卒之歲享年七十有八先妣生正德元年九月二十六日距卒之歲享年五十先考卒之年七月初三日繼母胡孺人亦卒距

其生正德九年二月初七日享年七十既奉安先考妣之柩亦奉胡母柩祔焉先考妣茂德懿行具載申相國楊襄毅誌中茲不備述特記其生卒時日併合葬之期如此用徵于永世云

條麓堂集卷之三十

行狀

太子少保兵部尚書兼都察院右都御史總督陝西三邊軍務南澗楊公行狀

公諱守禮字秉節別號南澗其先山西霍州人也高祖敬先者國初徙籍保安故又為保安人曾祖謙祖確仕為陝西蒲城縣丞道蒲因家焉以迄于今父通仕至陝西鞏昌府通判公為右副都御史時蒙恩贈二代如其官嫡母高氏贈淑人生母李氏封太淑人云公生而聰敏書目輒成誦年十五補郡庠生正德庚午以書經薦

于鄉明年登進士授戶部山東司主事三年擢員外郎
會洛魏盜起當道者議專設才官勦之朝議謂公才因
陞河南按察司僉事兵備大名等府公于是設捕格嚴
賞罰甫朞歲遠邇肅清桴無夜警民甚慶賴之適羣曹
公棄養遂以憂去服闋補湖廣按察司僉事振紀釐繆
不怵權勢居二載燁然有聲藩臬中時巨盜邢文憲者
藪聚百餘橫行湖湘間勢張甚諸司噤莫敢詰撫按官
會請增設撫治憲官一員俾才者任之朝議謂公才因
陞本司副使駐荊州公至則問民疾苦舉廢滯凡興作
種種絕不語及盜事諸賊子益自安迫方畧既已陰具

刻期四發澤薤草蒐一日俱獲靡有稽誅者焉撫按聞其功天子降勅嘉獎且出內帑銀幣賚之三年政大和會以他事失當道者意因中以瑣罪落職為四川叙州府通判華陽饑都御史唐公疏公知成都府公立法賑恤民賴以全人擬富鄭公青州之政云陞四川按察司副使兵備建昌未幾遷陝西按察使公在建昌有恩比代去雖七種蠻夷亦皆泣涕送之至陝益以精敏為政案無留牘因靡滯獄中外翕然風稜四達次年陞山東右布政使復轉左尋陞都察院右副都御史巡撫四川于時四川蠻寨為梗帝命守臣會兵討之久之天子遷

其功因命公往公即輕車入蜀躬歷營寨相機宜分撫
勦未三月遂剪元亮蕩巢穴因隨山刊木夷險守要松
茂之路大通川南數十年肘腋之患一旦滌而去之議
賞間遇藩司官素隙公者奏迴避且誣以事公回籍比
事白藩司官左降公亦落職為河南左叅政馬由叅政
陞浙江按察使四川右布政使轉山東左而巡撫寧夏
之命下矣寧夏三面控虜最為要邊而關隘多圯廢者
鳴鏑牧馬日聞見于園中邊人罷耕牧士且狎之公至
則振威武革貪蠹浚城隍增墩戍于是築鎮遠等關崇
赤木打磴等口罷平虜之守備而所之更臨山之堡而

數之通虜之路益稀士心知奮歲中獲功者再捕首虜
數百級焉虜于是不復犯寧夏天子嘉之錫以銀幣尋
加兵部尚書都察院右都御史以三邊總督任之先是
總督缺天子必擇在廷之臣可任者以往其巡撫任寔
自公始公總督凡三年經緯險易劑量遠近調度兵食
各中肯綮初至即條邊防數十事且曰馭狄之要不在
於戰而在于守任事之臣不貴于多而貴于專天子嘉
納焉又簡用將佐悉盡其才撫恤士衆人得其心故間
諜周烽火明器械備士馬練虜不敢時入入又輒敗去
三邊益用無警平時總督駐固原秋月則移鎮花馬池

以三邊調應道里均也及冬解嚴而還謂之防秋故邊
氓率以總督之出而愁厲焉公凡再駐花馬羽報甚少
輕裘緩帶出入徼堠間而旌旗曼衍鉦鼓聲震野邊城
頗生色焉故公之出入民莫不遮道歡呼忘曩之憂苦
也前後凡各鎮斬獲首虜千餘級降勅獎諭者五每勅
降輒有銀幣之賜最後以累功加太子少保會李淑人
卒公遂扶柩歸天子命吏治其墳遣官諭祭蒲人榮之
時嘉靖甲辰歲也後十二年為嘉靖乙卯公卒于家公
天性沉毅有局量應事初若不經心者而卒不爽鎔銖
故所至有功其襟度坦豁不屑屑事形迹故所至人傾

心焉其議論慷慨務大節聽其言磊磊軒舉足以破人
之拘礙遇事之不可與人之不當意者必不能屈意徇
之故屢躓而後起焉生平俸餘積二十餘金立義約以
贍族命子孫世守之家居十餘年慶姻友內外終始驩
洽足跡絕不及公府州南十里條山之陰有山曰東簪
泉石佳勝公覽而悅之曰是將休我廼誅茅葺屋鑿池
䟽圃以偃息吟嘯于中怡然窮年若未嘗涉世者著九
友集以見志有句云四時佳景無非物千載清修只在
人其風致可想也居山或數月一視家不數日輒復去
每賓至必劇談痛飲傾倒而後別時為樂府詞冷然有

格韻殊可喜家事付諸子輩絕不商有無語及當世事
井井曉析使人忘倦焉乙卯十二月十三日秦晉地大
震人死者十六七蒲郡不逞子乘之公然肆刼掠日轉
熾甚者裂繒為號聚至百十人洶洶若寄虎口公召諸
守禦官示以方略令一發不踰時姦黨駭散遂無事蒲
人所以戴屋炊爨藏死聚生以有今日者公之力也嗚
呼偉矣居無何公亦尋逝蒲人哭之傷心先是公居閒
忽拈筆叙生平履歷甚周且惓惓焉述君親恩隆重欲
報罔極之意顧命兒子輩識之人莫測其意未幾變作
而公往矣嗚呼其可異也有文集若干卷奏議若干卷

詞一卷藏于家公生於成化甲辰七月一日卒于嘉靖
乙卯十二月二十八日得壽七十有二配姚氏贈淑人
繼王氏封淑人子三人曰尹太學生公兄子嗣公者娶
鮮氏曰庠生娶張氏曰凡庠生娶馮氏俱側室鄭氏
出尹戶俱先公卒女四一適太學生馮昭鄭出一適裴
大叅子應熊二幼俱王出公有懿德在身茂勛在國諸
所表建宜垂不朽子凡慮其久而湮沒欲勾大人君子
立言之筆銘之貞石責於玄壤永有辭于世世以維鄉
里後進托述顛末自惟蹇昧無能窺公涯涘且晚生謏
聞多所遺失姑盡心之所知掇緝如此極知蕪淺不足

纂叙什三然義則慤實要惟陳之祝史而無媿云爾謹
狀

光祿大夫柱國少師兼太子太師吏部尚書贈太
傅謚襄毅虞坡楊公行狀

曾祖謚累贈光祿大夫柱國少師兼太子太師吏部尚
書曾祖妣張氏累贈一品夫人祖選初贈文林郎陝西
扶風縣知縣加贈通議大夫兵部左侍郎累贈光祿大
夫柱國少師兼太子太師吏部尚書祖妣趙氏初贈孺
人加贈淑人李氏初封太孺人加封太淑人俱累贈一
品夫人父瞻四川按察司僉事封通議大夫兵部左侍

郎累贈光祿大夫柱國少師兼太子太師吏部尚書妣
田氏初封孺人加封宜人淑人累贈一品夫人公諱博
字惟約別號虞坡姓楊氏系出弘農之華陰國初有善
甫者始徙蒲遂為蒲人六傳而至公曾祖諶諶子選是
為留耕翁以積德稱于鄉選子瞻是為舜原翁公父也
舉正德己卯鄉試仕至四川按察司僉事配田氏以正
德己巳五月二十四日生公公生而穎敏讀書能五行
俱下髫歲即徧誦五經年十三督學使者莆田周公宣
一見而奇之許以國器十七舉于鄉時嘉靖乙酉也已
丑登進士授陝西盤屋知縣有才能聲調長安長安附

在省會法刊而蠹積素號難理公勾剗姦校無能匿毫髮諸舞文胥史咸惴惴易慮居三載道不拾遺以廉介者聞于時唐文襄公龍王襄敏公堯封前後有事西土皆薦其治行第一癸巳欽取詣闕以年未三十陞兵部武庫司主事明年奉勅選寧夏軍戎陞武選司署員外郎尋實授陞職方司郎中會肅皇帝南狩承天起大學士翟文懿公繼為行邊使大賚將士文懿薦公叅幕府初至宣大時軍府新變後人情洶洶賚金不繼司餉者擬殺其額文懿公難之公曰公奉璽書得便宜從事聞鎮庫有羨餘盡徵之以廣上澤三軍大悅至肅州屬

番數百人遮道邀賞斬之不可予之恐來者滋衆公請
文懿坐堂上嚴儀衛列諸番跪轅門詰責之以相公奉
天子詔勞問若等法當傾巢遠迎而逡巡漫渙乃爾諸
夷懼服莫敢仰視久乃釋之按其先後至予賚有差諸
夷落未至者聞之悔不敢復來見是行也東抵遼陽西
及張掖車轍所經且萬里公悉紀其山川形勢地利險
易士卒勇怯與夫土俗民情利害欲惡之端咸得肯綮
文懿還闕薦公任大用天子嘉之賜以白金文幣時虜
勢方熾其酋吉囊俺荅以兵威脅屬迤北諸部衆至十
餘萬九邊無歲不遭侵軼而山西被害最酷羽書或日

夜十數至肅皇帝以膺懲責本兵惟公所規畫能當上
指施行之輒得筭肅皇帝以是知公安南久不庭詔辟
臣議行天討日中不決公奮臂揖諸公指陳機宜所在
衆遂以其議上比安南獻土請吏公謂小醜以不恭煩
王師既服當許自新毋利其土地庶足以服遠人心亡
後患隨上善後六事上悉從之公在職方且八年諸所
贊畫龜定甚衆是皆其大者它如修諸邊險阨簡練京
營卒格太監麥福濫增勇士之請暴總督胡守中詐首
虜伐塞木之罪大為時論所推癸卯陞山東提學副使
凡校士藝類于次旦甲乙之人服其敏乙巳陞山東糧儲

叅政東土錢穀久為奸吏窟諸猾胥率于出納間恣憊
冒至不可究詰公乃為循環格曆以十年為率凡錢穀
徵輸悉註其月日及賫運人姓名一覽其完負具見宿
猾無所措手積弊頓清丙午陞都察院右僉都御史巡
撫甘肅初罕東等衛屬番為土魯番所逼入處肅州久
之夷落滋衆往往與居民相戕殺公曰此地方剝膚害
也于是具牛酒召諸番酋犒之且語之曰若輩初來此
寄頓耳故無室居無田耕無城郭障蓋計且亟歸也今
長子孫矣既不能歸何不為久遠計酋曰為計柰何公
曰吾欲城堡爾居渠壩爾田釜鉏粟豆相爾窮爾恤孰

與諸攘攘在此朝夕苦不給也諸酋咸稽顙曰善唯公
命公乃檄副使王儀築白城威厲金塔等凡七城重門
巨障水草豐美諸酋咸率其部落競去男婦凡三千四
百有奇離塞遠者至五六百里肅境一清自亦不刺屯
西海北虜歲往掠之甘涼道梗公擇阨要創墩堡設兵
守哨行旅便之涼土沃乃屯田久廢公擬興之召父老
問故咸曰甘境三面臨虜墾田苦蹂踐且水渠通淤不
時而荒田免科令多不信即一丁受屯田闔室悉催追
呼之擾故官司屢招佃人無敢應耳公乃請于朝凡荒
田新開者永不科舊田拋荒者十年外科詔報如擬著

為令公遂鑿龍首等渠伐石穿洞委曲達水田所凡開
荒田萬餘頃水田且二百頃餘貸牛種子屯丁人爭應
佃乃限丁二十畝河西遂無閑田頗稱饒富公又為之
興文教奏以巡按御史督學政如遼東例四郡人文至
今遂彬彬有聞公簡練甲士嚴明烽燧平居常若虜至
虜不得輒近塞嘗一大舉入將士奮銳拒之斬首虜百
四十餘級獲鎗重萬計天子賜詔嘉獎進右副都御史
賚以金綺庚戌丁母田夫人憂詔以邊功特予祭葬西
人懷公恩擁道挽車泣迄今家為尸祝窮陬孤戍無間
焉方公之在肅也咸寧侯仇鸞者寔總兵鎮其地兇悖

貪狡大為地方害公會總督曾襄愍銑疏發其奸讐被
檻車徵下詔獄時襄愍議驅河套虜出修東勝及受降
三城並河為塞讐乃極詆其非計且生事冀以自解初
襄愍復侵疆議故相貴溪夏公言寔主之至是夏罷政
府歸分宜嚴相者故與夏有卻授指刑官文致曾夏獄
坐交結近侍律先後戮于市已讐暴起為大將軍兇焰
甚熾時時欲洩憾于公天子察其情竟不聽未幾讐殛
死天子乃召公為兵部右侍郎時壬子冬也癸丑轉左
奉勅兼食都御史經畧薊保二鎮諸所措置凡上三十
餘疏其大者若潮河川為虜出入孔道其地受塞外諸

水匯流入中國水濁而悍激蕩巖壑平漫無際板築挑
濬俱難為力公乃相水勢避其衝射宛轉建巨墩基以
堅石聯絡相望矢石火銃相及也自後虜遂不復取道
潮河事竣歸天子命公提督京城九門自庚戌虜薄近
圻後都城無歲不戒嚴涉秋即分兵夫守睥睨郊民皇
皇渡徙其帑避虜奸盜乘之中外惟擾公曰寇至尚須
鎮靜柰何無事自撓亂若此遂罷一切守門令而日督
兵將入圍營練之都民大驩其冬詔公以原官總督薊
遼保定軍務公以薊保近輔與遼東異禦虜當先遏關
次斬獲遂極力為修守計其冬東西虜糾衆薄古北號

二十萬戈甲之聲連亘百餘里公環甲登塞陴督將士
協力防禦虜擁衆奪牆凡三四攻不克乃併力攻孤山
柴驅其衆蟻附緣垣萬矢注射一虜攀堞上我兵截其
腕諸緣垣虜悉震墮虜氣遂阻是時赤白囊交馳至肅
皇帝日旰不食遣親軍使者訶諸軍戢守狀使者見公
露行立矢石間晝夜甲不解及將士勞苦狀具述以聞
肅皇帝慰悅賜公大紅獬豸衣一襲發帑金萬兩犒將
士公乃申明天子恩德諸將士莫不感奮勇氣百倍虜
守牆下凡八日火竟夕燭天突冲左右無慮數十次為
矢石火銃所傷者無算乃引退三舍地徘徊不即去公

募死士持火器夜入其營驚之竟夕四五發虜衆相蹂躪衝搏天明始定遂倉皇而散天子嘉公功進都察院右都御史兼侍郎廕一子錦衣衛千戶明年虜以萬騎入馬蘭谷公督大將周益昌擊走之獲其酋打來孫事聞有白金文綺之賜未幾天子召公入為兵部尚書尋加太子少保故相分宜公有子曰世蕃者狡黠險賊欲利無厭文武小大吏納賄伺其門如市吏兵二部為所撓久不獲舉其職公視事所司以故事請公喈曰天子命我總邦政若爾則權門司庫吏耳一切格不行凡黜陟將吏咸咨之閫外大臣令自為地方擇人分宜父子

滋不悅士有憂國心者視公為砥柱丙辰下父憂戊午
肅皇帝復召公為兵部尚書值虜寇大同圍右衛城連
月不解督臣以玩寇納侮下獄廷議置代未決上曰右
衛圍急其令博往事寧面部先是奉本兵命以未終禮
擬疏辭俄聞後命遂墨纒而往乃以疏慰曰皇上幸寬
西顧憂臣誓滅此賊以攄國憤上嘉答之因賜白金文
綺虜謀公出關即夕悉衆出塞去公以右衛久在圍城
中樵採路絕士煮革而食忍死固守無二志乃優加恤
獎疏褒其守帥尚表並陳善後十事遂經畧大同修守
要害測虜情預戰守凡上一二十疏上悉親為裁定不

下部議虜去既遠公以大同川原平衍虜騎飄忽艱于防禦乃聚糧具械分布修築躬自勞來獎勸之于是築牛心等堡寨墩臺二千八百七十二座挑濬大壕二道各長三十里攔馬壕六十四道凡五十日工報竣肅皇帝嘉其功大完速降勅獎勵賜以白金文綺隨諭輔臣曰宣大博理已平二歲可見凡事無人之效但有一人那得患來又曰博盡心邊務方在理中似來冬田部為宜朕意須加以一秩乃加太子太保兼右副都御史有虜酋哱素者稱魁桀時以輕騎抄我邊為地方害公以奇計擒之并斬其黨十五人因分銳兵襲擊並塞虜營

多所斬獲虜挺帳遠去邊警益稀公乃議築翁襄敏公
萬達所創大同長城乃列上修邊四事大約計費二十
萬金請內帑者十一上覽疏謂輔臣曰博修邊費少成
多比他動以四十萬用大不同這妄費全在各鎮誰肯
一言及公聞之感泣會虜入薊鎮督臣被收廷議移公
鎮薊上意以為然乃詔公移鎮時秋防屆期公聞命即
日趨居庸道中上經畧宣大及時繼理十事既入關乃
調度諸將魯聰等畫區分守而以副使等官李尚智等
監之下令曰某月日時各營據牆舉火為號某日某時
如之凡擺邊耀武者三自居庸距山海旌旗徑千餘里

不絕砲火之聲遠邇嚮應近塞夷衆走報諸酋時刻不
爽諸酋皆驚終歲不敢近塞上乃召公還部加少保當
是時分宜不便公入屢沮止之肅皇帝乃特旨召之復
特旨加貳孤分宜滋不懌會浙江總督胡宗憲計擒海
賊汪直汪直者徽人以販海為業往來倭島中因導為
寇朝廷懸賞格購之宗憲父事分宜假子趙文華行賂
世蕃所無涯量分宜欲因事侯之公執不可請下廷臣
議宗伯高安吳公山同公議宗憲竟不侯分宜父子益
憾公微諸聲色是時肅皇帝久不接群臣而操下益急
分宜內蔽聰明外恣行威福犯之者無不齏粉人人為

公危公亦知必為所陷夜宿外舍以待不測然肅皇帝
殊知公一日諭吏部曰朕聞自博入胡奴日伺邊外未
幾戎政缺人又諭兵部曰戎贊之用須要如博者會各
邊屢有奇捷法當叙本兵功公不自言上皆錫銀幣至
再由是分宜不敢復構公竟免于禍辛酉一品考績上
嘉其勞賜以羊酒鈔錠授柱國勲并以勲贈其三代寔
異數也伊藩與樸驕恣不法屢上書多謬罔語上疑其
有異志密諭公為方畧令司西安門啓閉及樸罪廢乃
罷尋詔公支正一品俸辛亥虜將大舉寇薊謀報甚亟
上曰自博入我每慮邊務今秋必有擾者早定策以遏

之公申飭邊塞使命絡繹而薊總督某者殊易虜乃東
巡遼陽公拊几曰虜氣甚惡亟徵各路兵協禦猶懼不
濟顧引重兵去遠徵是假之便道也與兒戲何異今茲
敗矣日夜十餘檄趣之旋而虜已潰墻子嶺入矣虜薄
近圻火光燭大內公夜宿部中前後上三十餘疏虜尋
引去議者咸咎薊督輕敵而服公先見云是時分宜先
已得罪去位矣公再入本兵且八年北籌虜南籌倭心
力焦勞日不暇給而南北所報功捷無慮數十次公皆
推功文武大臣不自以為伐乙丑上以公兩考詔再蔭
一子入監公疏辭上報曰茲酬功且用殲世其初辭丙

寅吏部尚書缺上諭廷臣令推至公為國三四員簡用
廷議首推公遂改吏部尚書公辭上報曰卿端慎公明
銓衡特簡所辭不允未幾而肅皇帝龍馭上賓矣莊皇
帝踐祚公首以錄忠諫舉遺佚為請于是楊文忠廷和
喬莊簡字熊恭肅浹林貞肅俊劉端毅王楊恪愍守謙
曾襄愍銑楊忠愍繼盛楊忠節最等皆贈謚葛尚書守
禮林都御史雲同曹都御史邦輔樊通政深趙御史錦
張主事翀皆拔擢又奏修平宸濠功令新建伯王守仁
子世其爵公論翕然稱之時士習稍頗以禪解談性命
士並世務幾東晉清談風且奔趨邪徑公相標榜肆不

知耻公痛裁正之凡譁張者無得售其術其風漸熄公以中外遷陟太驟政多苟且乃漸為久任法凡臺省有缺則推舊德家食者起用其郡邑長吏滿考有宜民績則加服俸仍在任丁卯一品三考詔加少傅燕太子太傅廕一子入監讀書國朝冢宰九年考績惟馬端肅公文升部援以為例公䟽言臣德望勲業不及文升萬一文升止進二官臣復廕子臣萬死不敢受上察其誠慙准辭廕已已以覆留都御史龐尚鵬有旨詰責公乃謝政去蓋是時左右倖臣不便公者有先入言耳于是前相興化李公等尚書劉公體乾等及兩京科道交章奏

留皆不報已而左右譖公者皆得罪天子知公無它幸未乃起公于家以冢宰治兵部事公再疏辭上獎其兩朝耆宿才德兼優仍諭以邊方多事大臣義當急國公不得已乃應詔是時西虜納款九邊所防禦薊遼為急公乃奏徵浙兵九千人復奏遣清軍御史徵北直隸山東河南山西陝西諸脫伍軍悉詣薊鎮以實畿左壬申今上登極首召公還吏部人心訢訢然時公一品滿四考詔賜寶鈔五千貫肥羜三上尊三十部侍郎奏國朝部臣無一品十二年者上曰楊博忠亮老成望隆中外一品四考勞績愈著加少師兼太子太師廕一子入監讀

書以示優眷尋覃恩贈三代如其官初公里居感腰痛
疾尋被詔敦趣力疾赴闕時時自念及是感激隆遇矢
心圖報不復以身為慮癸酉秋分奉命夕月壇分獻未
成禮疾作上疏歸印乞骸骨上不允加賜餼牢酒米公
辭益迫切有曰臣有不忍言去之狀不得不去之情臣
遭際三朝受恩深厚一不忍去皇上天縱聰明日新聖
學臣幸逢堯舜時二不忍去內閣元臣自為侍從時與
臣肝膽相照秉政以來杜群枉之門開衆正之路臣得
贊蕩蕩平平之化三不忍去臣自筮仕艱關戎馬無病
已衰矧復病勢如此一宜去吏兵文武事權臣任兵部

十二年吏部六年久妨賢路二宜去人臣任事全在助力臣素患中濕腰痛今復手足不仁三宜去上優詔慰留不久公再疏懇辭上乃許回籍調理令馳驛歸已賜寶鈔三千貫公伏枕疏謝勸上葆頤天和緝熙聖學孝養兩宮親近賢輔上報聞且諭令慎加調理以俟召命時公子俊民為太僕寺少卿俊卿為錦衣衛都指揮僉事詔皆許扶持歸蓋殊典云公歸未週歲以萬曆甲戌八月二十三日以疾卒得壽六十有六訃聞上輟視朝一日賜諭祭九壇命工部遣官營兆域贈太傅謚襄毅愍一子為中書舍人公豐鬚偉貌揚休玉立見者敬而

愛之神氣揚揚音吐洪暢好談論每及平生履歷及接人遇事與夫九邊阨塞險要兵馬錢穀盈縮堅瑕今昔登降之故疊疊如指掌聽者忘倦遇下有恩所至多見恩晚年位益尊而立朝極恪慎每朝必四鼓興危坐待漏邾寒暑無二其天性然也所著有虞坡文集八卷詩集二卷歷官奏議凡七種共七十卷雜著四卷公配段氏五封一品夫人生子男四人俊民嘉靖壬戌進士太僕寺少卿娶史氏封宜人俊士萬曆甲戌進士陝西鳳翔府推官娶裴氏繼裴氏俊彥官生娶王氏俊卿隆慶戊辰武舉第一人管錦衣衛事指揮使娶王氏封淑人

女三人一適州學生景宣一適舉人馮淪一適嵩縣守
備孫仲金封淑人側室賀氏何氏賀生男一俊臣官生
娶盛氏何生女一幼孫男六人元禎聘景氏元祥聘羅
氏元祉聘裴氏元禧聘張氏元祺聘洪氏元祐幼未聘
孫女十四人一適州學生張甲徵一適裴令聞一字洪
崇禮一字張定徵一字羅尚鉉一字韓煥一字祁世熙
一字韓曠餘幼太僕兄弟將以年月日葬公其原勅建
塋次乃條述公世次及立朝行已履歷之詳屬維為狀
將祈名世大筆銘諸羨道謹用詮集如左以備采擇云

右春坊右中允兼翰林院編修環江陳公行

狀

環江陳君諱謹字德言福建福州之閩縣人也世居光
俗里地曰瀛洲系出宋侍郎益之裔曾祖志祖琛壽官
父伯亮以君貴封翰林院修撰母卓氏閩陳氏世有潛
德迨壽官公修撰公益以謙慎仁厚著聞閭里故君之
生閭人咸以為積善報焉君生有茂質警悟不類凡子
先是修撰公既累失子晚始得君心甚憐念之不欲遣
就外傳親文史勞廼君甫垂髫即自知向學其所記誦
輒能䟽解意義塾中異之有試以子曰字俾為破者即
應聲曰匹夫而為百世師一言而為天下法其奇氣固

已炯然露穎矣年十五補邑庠弟子負每督學使者按部至必嘆賞拔置高品壬子舉于鄉明年癸丑進于春官賜對大廷遂以一甲第一人及第授翰林院修撰君初為弟子負也嘗同儕輩聚業邑庠之金粟山隣有阮姓者昔昔必夢雷動龍起于其處比赴秋試郡守又感異夢為諸生語之至是廼知其兆之不偶云君德宇粹穆不見涯際其接人貌恭氣和退然若恐傷之廼其中耿耿自信故登第未幾翕然著稱薦紳間曰陳君長者也丙辰奏績時修撰公迎養在都年七十餘日夕念鄉土思歸令甲諸親藩嗣立歲遣勲臣分行冊命禮而以

侍從近臣副之會君以次當遣遂拜命偶傳制日其行
視常期差早諸奉使者多後時遂併被逮君落職為廣
東惠州府推官人咸惜君無罪乃君以得扶侍南歸克
遂親志怡然就道略不介意比至惠諸士子嚮君名肩
笈從學者甚衆君教以立誠為已及擇術居業之大端
暇日則與之陟羅浮吊白鶴訪蘇長公遺跡脩脩有千
古之懷焉士大夫相承凡遷客為遠小官者率不久輒
量移去故多以傳舍視所居職漫不為理而諸監司守
長亦以容禮優之不欲以簿書煩也君曰崇卑皆王臣
柰何乃自異若此于是謁監司必以屬吏禮事守長必

以寮佐禮鞠大小獄必以情人不能欺曰者吏弗如也
丁巳改南太僕寺丞去郡諸士子攀援數百里依依不
忍別君為作詩慰勉之初在郡將行屬邑鮮月俸柴薪
銀至君命易田數頃俾掌之學官為諸生薪水資歸而
行李蕭如也南京太僕寺開治滁陽滁故多佳山水寺
治又特占其勝局開務簡凡歐陽公名迹悉往攀陟嘗
曰吾曩寓惠獲聆長公餘風今來滁復得尋六一公所
嘗登眺者左宦如此亦殊不惡爾戊午改尚寶司司丞
君去國凡三年始歸涉歷畏途益諳于世故于時屬海
波不靖方內頻有灾警而黥貨公行士風漸斂每當食

興嘆若負重在躬不可稅駕者其先憂遠量鍾于性者
深也君篤信好學每不以所能自足超然遠覽立志甚
偉既入都同年友姚江孫文和闢禁城西隅所居舍之
北為屋六楹延君及余朝夕居業其所久之于是余益
習知君之所存其表裏洞達隱顯不異行即在匆遽未
嘗見疾厲於言色與之談雖累旬日皆有益人語即不
言與之相對終日亦使人充然忘其鄙吝焉蓋汪汪乎
莫得而澄撓也庚申君轉南京國子監司業太學故設
科甚嚴歲久漸弛君酌其當復次第舉之乃其待諸生
極有恩故莫不畏而愛之甲子考績入都改右春坊右

中允典誥勅君悉心在事凡無停籍士大夫凡被恩典應受制命者必來謁無問崇卑君與之為禮必稱曰彼以親故致恭于我禮無不答也或有餽遺則必固卻之不受曰君命也吾職代言耳其敢任恩明年乙丑充會試同考官君雅有藻鑑自丙辰及是凡再典春試號為得人會修撰公棄養君聞訃哀慟奔歸比秋抵閩營善地為卜兆計初修撰公善治生占產甚裕君既貴貽書戒之曰善守官常勿為日用計吾能贍爾君守訓惟謹官凡五遷俸率不過六品前後皆取給于家及是將營公墓且損君曰吾不忍儉吾親而雅志復不欲貲助

於人蓋心獨苦矣未幾忽遭戍卒之侮抱病幾三月有
瘳矣尋感它症以歿嗚呼斯人也而乃止是耶命矣君
生嘉靖乙酉閏十二月十二日卒嘉靖丙寅三月十日
得年四十有二初配石氏同年進士石梁之妹繼鄧氏
子男一人應虞聘莆田少司空黃公女鄧出女二人長
一可適士夫龔某石出次一蘭字大司空林公子某鄧
出君慎于取與初居江潯卜舍城中舍人倍取其直後
有人白其事者君曰吾業已授之矣竟不問閩人至今
以為美談天性孝友初計偕北上至建溪回首南望
然涕下曰吾親老矣吾何為萬里行哉比官吏局及後

司南雍兩奉修撰公祿養迨公益老不欲出又戒君無懷歸故公之歿君慟恨其不及侍也弟誥有美質君撫而教之甚至誥亦事之如父君既歿誥率應虞擇某年某月某日將葬君某山之原遷前配石氏柩而合祔焉禮也遂走使萬里抵二三友人俾狀君行實叩師門乞銘其壙君既家閩海且宦轍數外適性復冲挹平日絕口不自言其伐其嘉績善行不可得而詳也謹即所見聞述其大略用備採擇云

先考封光祿大夫柱國少師兼太子太師吏部尚書中極殿大學士嶠川府君行狀

維不孝違遠庭闈不奉晨昏者且十年所矣方甲戌之
被召恩也府君蓋已壽近七袞矣維不欲行府君切切
以效忠報國為勉力督之出于時府君神情腴暢鬚髮
稍稍有白星其健步善食即少壯人有所弗及見者咸
謂期頤可待也不孝旋叨簡命叅政府末不敢復言私
每鄉中人來輒言府君神氣充王不臧甲戌別時亦有
云更勝者而府君時時貽書必自道康彊狀以寬不孝
曰若一志在公毋我憂也嗚呼詎意府君奄棄諸孤如
是之遽耶悲哉悲哉未聞訃前府君有書至其字迹楷
細叙示委悉與平日無異不浹旬乃承凶問蓋不孝報

國無狀獲罪于天明逝人非幽被神罰若此不然豈以
秉受龐固若府君施德不匱若府君守身善攝若府君
而遽至是耶嗚呼慟哉維扶杖奔歸左腋生巨癰當其
毒蘊神憤自擬不起竊念生不能侍養死得從先人地
下無所復恨第大事未襄有難瞑目耳荏苒三時苟存
喙息奉聖主卹恩卜兆州南風陵鄉條山之麓擇以甲
申二月十三日安厝不孝無以承懽生前思紀述遺德
以垂不朽身後者惟名世鴻筆是賴乃繹集先後見聞
之真併世系生卒列狀上請哀頓憤惻綴詞無緒然未
敢為一飾語以誣吾親仰冀台慈大雅加采錄焉不孝

孤維泣血謹狀府君諱允齡字伯延號岷川張氏之先
世居解梁鹽澤南陂元季諱思誠者避亂徙蒲國初其
子友直遂占籍蒲之通化坊云友直子仲亨仲亨子克
亮克亮子琇克亮府君高祖琇曾祖也祖父寧父誼皆
承恩誥贈如府君封祖母雷母解皆贈一品夫人初府
君祖父早世雷夫人矢志守孤迄于成立既而府君生
氣宇嶷然眉目爽秀閭里咸詫異之謂為堅貞應也未
幾府君復失怙解夫人奉姑撫孤以持門戶府君年方
幼學即鞅掌家政為勤攻苦期于自樹以慰兩世孀
母之心甫弱冠產駸駸稱裕矣府君識量宏遠諸所廢

居劑量往往牟竒息年盛志銳謂程卓業可立致樂易
個儻不與人競刀錐至于睦親周急尤汲汲若不及也
會無良子數輩相與乾沒其貲衆為之不平請理之官
府君曰吾為君賺命也天必鑒之寘不問用是驟困每
鬱鬱曰吾不為生厚計念無以承孀母懽媿子道爾遂
發憤遠游西度臯蘭歷浩疊居貨張掖酒泉間數年乃
南循淮泗渡江入吳又數年業益困則溯江漢西上夔
峽歲往來楚蜀間已乃北遊滄博拮据二十年足跡且
半天下雖治市廛業其視財利甚輕篤信重義南北所
至必為衆所敬服諸貿易夥分或比于爭搆輒詣府君

請平水陸出入或有事鬼神必推府君灌祝性夷澹世俗嗜好一切不入其心所至潔除一室焚香靜居不與衆嘻嘻狎讌客至乃啓戶儕輩無老少見府君無敢不莊語者每靜定久遇事物將至輒先幾而覺人以為異或疑有他術府君曰偶數日無事然爾一接事即無復覺矣何術也教不孝輩極嚴自知言笑即每事規誨因小喻大勉以立心守身之義詞指凜凜迨不孝輩知學府君方跋涉川陸或數歲一歸每貽書督勵購諸經傳註疏義及史漢諸書車寄之或議其非要者府君曰兒輩資可教吾冀其為通儒也癸丑不孝登進士府君就

祿養京邸居常語不孝曰吾祖宗積德百年為閭里傳
頌吾祖母吾母兩世艱貞幽明感應乃於兒輩發之必
無負國恩有益百姓乃可延世澤吾勤勞半世雖殖產
未豐然不令爾憂俯仰也辛酉不孝考三年滿蒙貤封
府君翰林院編修謝恩闕下時府君年五十餘明眸黧
髮僅若三四十者士林榮之癸亥思鄉西歸治別墅州
城東十里之孟盟橋鑿池疏圃結宇其中雜植花卉四
時咸有新意良辰佳日輒招邀親舊清談雅飲或時巾
車策杖從田父野老話桑麻尋丘壑脩脩然有物外趣
焉避囂養意絕不干郡邑事前後郡大夫高其行誼敦

請賓鄉飲多力辭不赴蒲為秦晉通達不孝既終政府
府君深自閼匿冠蓋往來槩不與相接始而人或疑其
簡倨久乃諒之敦仁篤親本之天賦每念雷夫人解夫
人二外氏嗣祀衰絕祠二氏祖妣于家又為葺其壙宇
繚以崇墉各以石表其墓歲時率子姓祭掃以為常與
弟友愛篤至常曰吾弟吾母所特憐也相守白頭不異
童幼已乃為建豐屋擇良田厚貲給之每視其顏色以
為欣戚後叔氏家口滋浩邁老疾府君疑其憂生復給
以千金又為之婚其幼子之年方成童者冀以悅其意
叔氏歿哭之慟治喪特厚閭黨嘖嘖歎之性好施予族

黨姻里有不能治生者授以資婚喪不能舉者為舉之
老無歸者幼無依者居無室者為衣之食之屋宇之使
之得所平生所受人一言之惠錙銖之施必求酬報且
終身不忘諸所被凌轢寔陷雖極毒害不校也蓋天性
如此自受編修封後且十年進封為奉直大夫左春坊
左諭德兼翰林院侍讀後再進封通議大夫吏部左侍
郎兼翰林院學士比不孝叨三事初以大婚禮成覃恩
封光祿大夫少保兼太子太保禮部尚書武英殿大學
士繼以考一品滿進封光祿大夫柱國少傅兼太子太
傅再以皇子生加上兩宮徽號覃恩封少師兼太子太

師吏部尚書中極殿大學士凡受勅封者一誥封者五
每貽書不孝曰吾以布衣封極品國恩至矣兒所求以
報稱者宜如何須有以安我心乃為孝爾邇歲余舅氏
大司馬鑑川翁致政歸相與徜徉山水間神志怡暢益
孜孜好事擇別墅中隙地構石築山綽有幽致北土鮮
竒石府君方經營山址偶舟人于黃河中得秀石來獻
因令工人入水探之獲石甚豐峭怪挺拔迄成山取之
不竭此從來所未有亦異甚矣府君一生少病其起拜
輕便步履迅捷與人迥殊每登高涉遠衆至扶掖喘噓
府君矯焉獨前了無所苦三月初偶感微恙尋愈矣已

復病又愈又復諸子孫憂之府君恃其素壯夷然以為
無它虞也已而竟不起悲哉悲哉不孝既聞訃于京五
內摧裂擗踊昏頓蒙聖上惻然軫念特頒手諭遣中使
唁慰上及兩宮聖母各賜齋糧麻布香燭酒鈔賻以金
帛甚厚勅賜塋城命工部主事沈一中營葬事頒諭祀
六壇命禮部員外郎張志致祭寵卹隆渥諸哀死厚終
之恩悉超常典不孝罪孤仰怙覆燾大德照臨休曜以
榮親地下晨昏曠侍之罪借以少贖焉嗚呼豈非千載
之異俾也哉府君生于正德丙寅四月四日卒于萬曆
癸未三月二十三日享壽七十八歲元配王氏累贈一

品夫人生子七人長即不孝四維娶王氏累封一品夫
人次四端後軍都督府都事娶李氏楊氏姚氏李氏次
四教龍虎衛指揮僉事娶馮氏次四事州學生娶王氏
李氏次四象國子生聘王氏娶范氏景氏次四隅殤次
四術殤冥婚沈氏繼配胡氏無出晚年有子二人四岳
娶孫氏四臣聘景氏女二人一字賈賓一字孫守陳俱
勝侍出孫男十一甲徵兵部武庫司主事娶楊氏恭徵
禮部儀制司員外郎娶孫氏定徵中書舍人娶楊氏久
徵娶羅氏善徵娶辛氏元徵聘楊氏獻徵殤性徵聘韓
氏吉徵聘楊氏光徵麟徵孫女十一適兵部武選司郎

中馬慥一適庠生沈懋一適舉人楊煊一適傳應夏一
適庠生韓煥一適庠生郭里一適衛中都一字沈恕一
未字一字劉思道曾孫男三贊聲輦曾孫女一

先母王孺人行畧

先母姓王氏父為封刑部主事素庵公母孫孺人于正
德丙寅九月二十六日生先母母生而端惠溫仁先外
曾祖父母極鍾愛之天性至孝外曾祖耆而病母為之
盥櫛飲食朝夕時其寒溫外曾祖每語人曰是兒仁孝
後必昌外曾祖者教諭贈中書舍人敬齋公也于時叔
外祖中書舍人止一公業儒教余舅今常鎮兵備副使

鑑川公于家塾先母性敏慧耳而識之即成誦故維兄
弟始知學時讀千文孝經庸語諸書悉先母口授于修
隨箴組之間鄰母亦有以其兒來學者至今歷歷也年
十九歸于我家時先曾祖母雷祖母解俱守孀在堂一
以孝勤曾祖母曰婦仁親吾老得所矣祖母曰婦克內
理吾業有所承矣未耆中外驩然譽焉曾祖母歿後家
君商遊四方率歷歲一歸遭數不偶蒲歲又比歉而先
祖母且衰先母憂心瘁力不可殫狀余兄弟又衆悉幼
弱無能任憂者母且授以儒業稍長即遣就外傳自館
歸輒稽當日課一不及程即正色斥退比明日課及程

始色解且自知言笑動示以禮義少長之序嬉弄有非
理色止之無已以聲止然撫育則極慈暨余從兄弟與
今諸孫幼無不愛戀之一見即投入懷中提携身前後
時有二三以其訓有式也故凡有拗啼及諸童性告以
先母至即寂然果母至兒必自曰我無是我無是殆謂
信不在言戚不在肅者爾及先祖母違養家君及叔父
俱遠出母慟姑守孀半世臨歿子無側侍者每哭必夜
分隣人聞而泣者歷數壁焉初母事姑孝久益至歲凶
家窶脫簪珥易奩具凡飲食衣襦衾薦必極精潔每供
時新必約為數次進兒輩不令知也綜理家務中外斬

斬嘗語維曰我自為爾家婦三十年未嘗終夜寢也維
心識之益勤苦極矣自維登鄉試家君業亦漸裕母雖
稍心泰然子婦益衆嫻戚日益繁夥家務益浩其勞瘁
抑又甚焉余自壬子冬赴春試幸獲舉尋被恩命讀中
秘書心未嘗不日夜家也人自蒲至即訊之曰母康泰
視昔倍得家書必曰母康泰視昔倍余意母方五旬諸
弟能承顏且通曉方餌即二十年内猶非所憂者詎意
凶變若是亟耶痛哉痛哉追憶生前言行種種可述即
欲撰次然每一援筆心如焚裂哀迷中又不能詳第其
言敬具大略如右抵家後容詳狀行實以呈